



DEO OPTIMO MAX.
UNI ET TRINO,

VIRGINI DEIPARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS
*manè discutienda, in Scholis Medicorum, die Jovis decimâ-nonâ
Novembris anni M. DCC. XXXIII.*

M. GERMANO PREAUX, Doctore Medico,
Antiquiore Scholæ Magistro, & Regio Professore
Emerito, Præside.

*An Imaginatio ut plures præter naturam affectus gignere, sic plures præter
naturam affectus sanare possit?*

I.



RUTA animalia * quidam mera esse Automata volunt, quæ
omnes motus, sensus, atque appetitus functiones, absque ullâ
prorsus cognitione peragant: alii de Brutis animalibus magis
gratosè existimantes, ipsis concedunt sentientem Animam, quæ
constet ex atomis igneis, sive ex subtilioribus sanguinis parti-
bus, quæ sit corpori coextensa, cum ipso nascatur, cum ipso
intereat, quæque tribus sensibus interais, sensui communi, imaginationi, &
memoriæ ad nutum imperet. Anima rationalis, animæ sentientis, & corpo-

* Cariesius.
Digbeus An-
glus.

reæ nil indiga, per seipsam in Homine hujus functiones sufficienter obit, hæc licet simplicissima, variis tamen pro functionum varietate distinguitur nominibus; dicitur, judicium, ratiocinatio, sensus communis, imaginatio, memoria; judicium, cum exploratâ diligenter rerum naturâ, de iis rectè judicat, bonum à malo, verum à falso accuratè discernit; ratiocinatio, cum stabilitis duabus propositionibus, tertiam elicit, quæ sit conclusio; sic exempli gratiâ, posito quod ii, qui artem exercent abstrusam & difficilem sint veniâ digni, si nonnunquam erraverint; posito quod Medici artem exercent abstrusam & difficilem, concluditur Medicos esse veniâ dignos, si quando erraverint: dicitur anima sensus communis, cum objectorum species per sensus externos allatas, à se invicem distinguit, odores à coloribus, colores à sonis, &c. Vocatur imaginatio, dum res sibi repræsentat aliter quàm à sensibus externis oblatæ sunt, aut aliquid comminiscitur quod ad propositum finem assequendum sit utile; memoria denique, cum rerum præteritarum reliquias in cerebro idæas, ac veluti sopitas exsuscitat, & earum præteriscitur.

I I.

CUM omnia in humano sætu ad animæ receptionem sunt aptè disposita, anima rationalis à Deo infunditur, sed nuda & omnis expertis artis & scientiæ: errabant itaque Platonici qui cum animadverterent quosdam homines in artibus & scientiis brevi tempore mirabiliter proficientes, putabant ipsos non tam acquirere nova, quàm eorum reminisci quæ in animis fuissent, ante suam in corpus ingressiorem: sed quamquam omnis anima rationalis sit ejusdem similisque naturæ & conditionis, pro variis tamen cerebri dispositionibus, varias & plurimis perfectionis gradibus discrepantes functiones edit. Equidem in omni homine prima objecti comprehensio est aqualis, idiota quippe quod ante oculos versatur æque percipit ac Philosophorum præstantior, & sic de cæteris sensibus; in judicio, imaginatione & memoria res multo aliter se habet: quidam judicio cæteris antecellunt, quidam imaginatione, quidam memoriâ; pauci quos propitia Natura amavit, in tribus istis functionibus simul excellunt. Qui admirabili judicio pollent constituendis Legibus, juribus unicuique reddendis, & subtilioribus politicæ Artibus instructi, administrandis Regnis sunt aptissimi; qui acri & vividâ imaginatione præstant sunt ad Picturam, Poësim, Musicam, Mechanicam habiles & idonei, quin & ad praxim Medicam, eam, ut putat Joannes Huartus, * imaginatio remedia excogitare tempore opportuno adhibere & quod in rebus Medicis est summi momenti occasione uti sciat, quam, cum ex Hippocrate * præceptis sit, semel elapsam recuperare vix detur: quidam ingenti memoriâ præditi sunt, & dum judicium abest importunâ garrulitate singulis obstreperunt, fiuntque tardiosi.

I I I.

CUM ad bene imaginandum, organorum Cerebri aptæ sunt dispositiones, anima res imaginatur quales sunt; aut si voluptatis gratiâ (magnæ sunt enim lenocinantis imaginationis illecebræ) res imaginatur absonas, a ratione alienas, extraordinarias, atque etiam impossibiles, iis sane delectabuntur at saltem fictitias esse certò cognoscer, nec iis vanè deludetur; at cum imaginationis organa depravata sunt, anima non solum imaginatur res ridiculas, incongruas, & rationi refragantes, sed iis acquiescit, & tanquam veras sibi repræsentat; hinc fit ut hic vereatur ne cælum ruat; ille in brutum

* Libro de
Servitio ani-
mor.

* Libr. A-
phorif. 1. A-
phor. 1.

animal se conversum putet; alius viam affectet olympo, & cum Deo & Angelis familiariter colloquatur; alius se regem esse, aut principem existimet, hic ex butyro constatum esse corpus suum reatur, nec audeat, ne colliqueſcat, ad ignem accedere: ille se vitreum esse opinetur, & durioris cujusque corporis occursum timeat: alius dubitet mingere, ne totum orbem submergat, centum ora, centum linguæ non possent tot deliriorum species sigillatim recensere: tanta autem deliriorum varietas ut plurimum pendet a temperamento, ab animi pathematis & vitæ conditione; à temperamento, biliosi enim delirant ignes, incendia, pugnas; sanguinei res ludicras, convivia, hilaritatem; melancholici res horrendas, inferos, dæmonia, supplicia, cruces; ab animi Pathematis, aliter enim delirant avari, aliter amantes, aliter ambiciosi; à vitæ conditione, qualis enim fuerit vitæ conditio & status, talis frequenter se representat deliratio, & sæpe contingit, idque miratione dignissimum, ut infanientes isti in uno objecto delirent, in cæteris apposite ratiocinentur: sed quod valde probat depravatam imaginationem esse tot præter naturam affectuum efficientem causam, præterque delirantes, absque ullo remedium subsidio, solâ imaginationis per fictionem sanatione, ad bonam mentem feliciter reducti sunt: quidam putat sibi non esse caput, ejus capiti impositus est pileus plumbeus, ex cujus pondere cognovit se caput habere; alius animo sinxerat se habere cornua, cujus capiti applicata sunt cornua, quibus abscissis, statim convulſit; cujusdam erat opinio sibi nasum esse longissimum, sed frustulum carnis naribus appositum, & rescissum, ipsum sanitati restituit; putabat alius ventrem suum esse serpentibus reſertum, serpentes in ejus excrementa injecti sunt, quibus conspectis tali delirio solutus est.

I V.

QUOT insuper præter naturam affectus gignit, sive ab internis, sive ab externis causis læsa, turbata, depravata imaginatio? Ponamus ab aliquo obſonium, quod sit ejus palato gratissimum comedi: is si forte in eo pilum, aut immundum quidpiam reperiatur, illico turbatur imaginatio, ventriculus subvertitur, & antiperistaltico motu percitus, sumptum obſonium protinus vomitu rejicit, Spiritus animales inter dormiendum, à sensuum exteriorum functionibus vacantes, licet quodammodo ferientur, tamen quoniam in motu consistit eorum natura, adhuc moventur, agitantur, & idæas exſuscitant ab objectis externis in memoriâ relictas; hæ nonnumquam tam horrenda offerunt imaginationi somnia, ut iis agitata, atque efferata, motus spasmodicos pariat, & ii qui talia experiuntur somnia subito evigilent cum cordis palpitatione, & summâ totius corporis agitatione. In affectibus quibusdam animi gravibus, ut irâ & metu, imaginatio spiritibus in quos imperium habet, inordinatum nimis impetuolumque motum impertiens, potest motus Epilepticos parere; narrat * Gabelchoverus Historiam cujusdam Juvenis, qui ex irâ in Epilepsiam incidebat; narrat Willifus Historiam Virginis quæ ex terrore pestis spasmis fuerat exagitata. Reperti sunt qui viſo epileptico, statim Epileptici facti sunt.

V.

SI plures, ut probavimus, præter naturam affectus gignere potest imaginatio, plures etiam præter naturam affectus potest sanare: omnes fere morbi ab obstructione ducunt originem; obstructio membranarum ceterbi & nervorum gignit delirium, Phrenitidem, Paralyſim, Cæcitatem, Surditatem; obstructio tenuissimorum sanguinis canalium, affert partium tumorem, inflam-

* Centuriâ
4. curat. 23.
* Lib. de
morb. convuls.
ch. 9.

mationem, doloris sensum, vasorum disruptionem, hæmorrhagiam, sanguinis stagnationes, putredinem, abscessus, ulcera; obstructio vasorum lymphaticorum parit strumas, bronchocelen, tophos, tubercula, tumores œdematosos, hydropem; obstructio jecoris gignit alvi pigritiem, ictærum, febres ardentes, Erysipelata; obstructio pulmonum spirandi difficultatem, asthmata, &c. Ad tollendas obstructions, spiritus animales sunt potentissimi, dici vix potest quanta sit eorum virtus, quanta efficientia: id videre est in iratis, quorum vires sunt maximæ in phrenitide, mania, furore uterino, in quibus ægrotantes vix à pluribus contineri possunt: ac ii quantumvis potentes & actusosi, ad agendum impelli debent; id præstat anima, quæ summum habet in spiritus imperium, ipsosque ad libitum regit ac dirigit; sed ad impellendos ipsos, nec judicio, nec ratiocinatione, nec sensu communi, nec memoriâ, ut pote languidis facultatibus utetur, solam imaginationem, ut actuosissimam, adhibebit: anima itaque summâ recuperandæ sanitatis cupiditate excita & viribus imaginationis facta valentior, poterit per spiritus impetuose propulsos, obstructionem morbi causam tollere, idque sola, sibi suisque viribus relicta, & absque ullo prorsus externo præsidio: quod si quis quærat quomodo anima novisse possit obstructionem esse morbi causam, cum functionibus spiritalibus unice attenda naturalis œconomia ignara sit; is tale responsum habeat, homini quemadmodum ceteris animalibus concessum à Deo naturalem instinctum, qui conservando homini additus, & levandis ejus morbis invigilans, possit animæ, imaginationisque conatum roborare, & spiritus ab iis impulsos ad obstructionis sedem recto deducere,

Ergo ut Imaginatio plures præter naturam affectus gignere, sic plures præter naturam affectus sanare potest.

DOMINI DOCTORES DISPUTATURI.

<i>M. Guillelmus de Magny.</i>	<i>M. Joannes - Damianus Chevalier.</i>	<i>M. Michael - Ludovicus Reneaume de la Gassagne, Censor Academiae & Regia Scientiarum Academia Socius.</i>
<i>M. Gabriel - Antonius Jacques.</i>	<i>M. Claudius Brunet.</i>	<i>M. Raymundus - Jacob Finoi.</i>
<i>M. Claudius de la Vigne de Frecheville, Medicus Regis & Domus Reginae ordinarius.</i>	<i>M. Ludovicus de Santeul.</i>	<i>M. Ludovicus Lemery, Medicus Regis ordinarius, Regiaque Scientiarum Academia Socius, & in Hortu Regio Chimiæ Professor.</i>

Proponebat Parisiis TUSSANUS-GILBERTUS BOULLAND;
Bituricensis, Baccalaureus Medicus, A. R. S. H. 1733.
à sextâ ad meridiem.